



REPUBLIKA E SHQIPËRISË
AUTORITETI I KONKURRENCËS
KOMISIONI I KONKURRENCËS

VENDIM

Nr. 588, Datë 28.01.2019

“Për hapjen e procedurës së hetimit paraprak në tregun e depozitimit dhe devijimit të energjisë elektrike”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 28.01.2019, shqyrtoi çështjen me:

Objekti: Hapja e procedurës së hetimit paraprak në tregun e depozitimit dhe devijimit të energjisë elektrike;

Baza Ligjore: Neni 8, neni 9 dhe neni 42 pika 1, i Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar (Ligji Nr. 9121/2003) dhe Rregulloren “Për organizimin dhe Funksonimin e Veprimtarisë së Autoritetit të Konkurrencës”,

Komisioni i Konkurrencës, pas shqyrtimit të:

- Relacionit të Sekretarit të Përgjithshëm të Autoritetit të Konkurrencës;

VËREN SE :

1. Pranë Autoritetit të Konkurrencës, Sekretariati i Komunitetit të Energjisë (ECS) ka paraqitur një kërkesë me objekt “*Njoftim për një sjellje të mundshme anti-konkurruese dhe kërkesë për hetim*”.
2. Sekretariati i Komunitetit të Energjisë (ECS) i drejtohet Autoritetit të Konkurrencës në lidhje me një ankesë të një operatori, GEN-I Tirana SHPK (Furnizues dhe Tregtues i Energjisë Elektrike) depozituar pranë ECS në lidhje me disa shqetësime në tregun e energjisë elektrike:
 - Pretendohet se është shpërndarë informacion konfidencial në përfitim të “pjesëmarrësve të privilegjuar të tregut”, lidhur me ofertat e dorëzuara nga

pjesëmarrësit e tjerë, duke u mundësuar atyre të paraqesin ofertat e tyre me diferencë shumë të vogël lidhur me ofertat më konkurruese, duke siguruar kështu rezultatin e dëshiruar të tenderit si dhe nëpërmjet sinjaleve të pasakta, të rreme dhe çorientuese lidhur me prodhimin e tij në treg duke i dhënë informacion të brendshëm “pjesëmarrësve të privilegjuar të tregut” dhe;

- Dy marrëveshjeve kuadër të lidhura ndërmjet KESH dhe kontraktorëve respektiv (kontrata “depozitimi” dhe kontrata “devijimi”).
3. Në vijim të shqyrtimit të kërkesës së Sekretariatit të Energjisë, konstatojmë se KESH i realizon procedurat në përputhje me rregulloret të posaçme të miratuara nga ERE dhe nga Ministria e Infrastrukturës dhe Energjisë.
 4. Nga të dhënat e administruara nga faqja zyrtare e ERE, rezulton se pavarësisht se janë 110 operatorë të licencuar në treg për tregëtimin e energjisë elektrike, në procedurat e tenderimit të zhvilluara për periudhën janar 2017 deri në gusht 2018 kanë marrë pjesë një numër i kufizuar operatorësh, vetëm 9 operatorë.
 5. Në lidhje me marrëveshjet kuadër të lidhura nga KESH, është konstatuar se në Ligjin 43/2015 ‘Për sektorin e Energjisë Elektrike’, i ndryshuar, parashikohen transaksione të tilla si blerja, shitja dhe shkëmbimi. Në lidhje me shkëmbimin e energjisë elektrike, respektohen procedurat sipas rregullave dhe procedurave të shkëmbimit të energjisë elektrike.
 6. Në lidhje me marrëveshjet Kuadër të “depozitimit” apo të “devijimit”, për të cilat referohet kërkesa e Sekretariatit të Energjisë, ERE në vitin 2016 ka marrë Vendimin nr. 131, datë 15.08.2016 “Mbi ndërprerjen e procedurës së shpallur nga shoqëria KESH SHA “Ftesë për ofertë për shprehje interesi për marrëveshjen kuadër për depozitimin e energjisë elektrike”, sipas të cilit ERE, si institucioni rregullator në sektorin e energjisë ka vendosur që KESH duhet të ndërpresë çdo veprim të mëtejshëm për finalizimin dhe përfundimin e kësaj procedure.
 7. Si përfundim konstatohet se nga kërkesa e Sekretariatit të Komunitetit të Energjisë dhe nga ankesa e depozituar pranë institucionit tonë për dijeni, nga një operator i licencuar për tregëtimin e energjisë elektrike, potencialisht mund të evidentohen elementë të cilat mund të përbejnë shkelje të dispozitave në fushën e konkurrencës.
 8. Në procedurat e realizuara për depozitimin dhe devijimin e energjisë elektrike, mund të ketë elementë të kufizimit të konkurrencës në kuptim të nenit 9 të Ligjit 9121/2003.

PËR KËTO ARSYE:

Komisioni i Konkurrencës, bazuar në nenin 8, nenin 9 dhe nenin 42 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar dhe Rregulloren “Për organizimin dhe Funksonimin e Veprimtarisë së Autoritetit të Konkurrencës”,

VENDOSI:

1. Hapjen e procedurës së hetimit paraprak në tregun e depozitimit dhe devijimit të energjisë elektrike, për të parë nëse ka ose jo shenja të kufizimit apo shtrembërimit të dispozitave të ligjit nr. 9121/2003 “Për Mbrojtjen e Konkurrencës”, i ndryshuar.
2. Raporti i hetimit paraprak duhet të paraqitet në Komisionin e Konkurrencës jo më vonë se 3 (tre) muaj nga dita e çeljes së këtij hetimi.
3. Ngarkohet Sekretari i Përgjithshëm për zbatimin e këtij vendimi dhe njoftimin e palëve të interesuara.

Ky vendim hyn në fuqi menjëherë.

KOMISIONI I KONKURRENCËS